

執蒲葵扇。左手撫爐。爐上有壺。其人視端容寂。若聽茶聲。然其船背稍夷。則題其上文曰。天啟壬戌秋日。虞山王毅叔遠甫刻。細若蚊足。鉤畫了了。其色墨。又用篆章一文曰。初平山人。其色丹。通計一舟。為人五。為窗八。為簾篷。為櫂。為爐。為壺。為手卷。為念珠。各一。對聯題名。并篆文。為字共三十有四。而計其長。曾不盈寸。蓋簡桃核修狹者為之。魏子詳矚既畢。詫曰。嘻。技亦靈怪矣哉。莊列所載。稱驚猶鬼神者良多。然誰有游削於不寸之質。而須臾瞭然者。假有人焉。舉我言以復於我。亦必疑其誑。乃今親睹之。繇斯以觀。棘刺之端。未必不可為母猴也。噫。技亦靈怪矣哉。

虎口餘生記

邊大綬

余自壬午春。伐賊墓。米人洵。謂必招禍不測。余諭之曰。如賊果修怨。余一身當之。定不爾累。眾皆疑信不一。而艾朝棟高映元馮起龍等。實為賊之姻黨。聞賊行牌。至西安。有四月十九日起馬入秦之語。遂羣謀俟賊到。時執余暨艾詔黑光正等。獻賊逆謀。嗚呼。有據。余欲申聞撫臺。而其巡捕常昌運與高映元內親。恐其與援中

阻。遂密稟張按臺。不意黨人在勢要門牆。蚤為先容。竟致沈閣。值新按臺至。為余同鄉金公。逆黨陰不自安。共謀去余。會部咨甄別賢否。撫臺列余薦劾。按臺又欲會題陞城堡廳。黨人益惴惴。值十六年大計。伊探訪余官評稱最。其恨愈深。遂捏造單款。極力傾陷。然終以司册無過。未能大害。止蒙降處。報到之日。米人老幼泣嗟。痛余之去。而余舉家慰快。謂得脫苦海。且遠仇讎也。撫按皆諭留候題。照舊管事。余力辭解任。出疆之日。不能為行李。時長兄順為山西澤州守。因赴澤。是為歲之七月初旬。至十月六日。而闖賊破潼關。旋聞陷西安。州縣皆望風投獻。晉中震驚。余十一月自澤歸里。撫指逾歲。賊烽已逼晉而東。會真定叛卒。殺撫臺迎賊。固關失守。三路犯神京。遠邇震恐。父兄親戚。咸為余憂。勸遁迹以避。余憮然曰。一身可隱。其如八口何。即妻孥可捐。婦母何賴。萬一蒙難。吾何以見先人於地下也。况同堂手足。一公族眾。寧忍全一己之生。貽多人之害乎。吾原為朝廷滅賊計。今日為社稷死。有餘榮矣。何以避為。遂違眾意。三月廿一日。驚傳都城已破。萬乘殉國。余聞之。北向

慟哭。再拜成服。杜門謝客。以聽天命。越四月廿八日。聞人言。嘖嘖道賊犯山海。敗潰西走。余聚親契諸生謝銘石等密謀。欲興義師。邀賊以雪國忿。擬次月朔舉義旗。而次日賊之緹騎到矣。先數騎進城。持令箭。詭言覓公館。實以覘余之居處也。余窺知有變。立街頭待之。頃有衙役二人。傳偽令曹懷玉票執余。余挺身往見。即付賊使白姓吳姓者。云萬歲取你做官。無恐也。余隨之行。入堂弟大任宅。老幼驚避。賊坐索飲食。無應者。不勝怒。肆行砍毀。搜掠一僕為之。供僞官。又遣人來供奉。並糾余不使離寸步。內外不通一信。旁午。余長兄來視余。始知母妻家口盡下獄。一門兄弟俱被執。則澤守兄暨堂弟廩生大顯。大任。大顯。姪銘瑋。從弟諸生大防。大中大謨。大訓。叔知縣維隆。維明。族叔諸生有道。武舉有謨。寄倉圍邑父老討保。長兄始得來一面。余聞之。五內如割。相對不交一言。即與兄永訣矣。謝生銘石來探余耳語。曰。聞賊已敗。大兵且至。兄放心行。毋為賊屈。我將謀有以脫兄者。余領之初一日。執余西行。眾為備一蹇。衛僮僕散。覓一市徒相隨。邑人觀者塞巷。皆為噓

唏。余忻然就道。是日至肅寧。二日至安平。三日至無極。此日大雨。賊眾悉披雨具。余露身淋漓。行三十餘里。次日至真定。入城。喧傳萬歲駕將至。賊黨衣紅者滿街。謂老府兵。見余咸擲揄曰。是伐墓人耶。帶余見偽帥馬入其二門。一賊衣藍紗者。云是旗鼓。詢伐墳始末。入後堂。稟偽帥。傳言且出。遂同吳旗牌至其家宿。至次月初五日。甫出。即有賊來。傳馬老爺上南門發兵。候駕至。便起行。吳姓者遂帶余往見。至街頭。則云老爺上西門矣。復至西城上。吳姓者先到。指余曰。出城。見賊兵自北而南。塵土蔽天。然皆老幼參差。狼狽伶仃。十賊中夾帶婦女三四輩。全無紀律。余見之不勝忿懣。如此鼠輩。而所向無堅城。致萬乘屈沈。真可痛哭流涕也。恨余被執。不能殺賊。見其滅亡耳。立數刻。吳姓復同一任姓者。押余入城。至督府前。候一二時。偽帥不返。條傳曰。萬歲至矣。不進城。在關帝廟喫中火。即行。二賊又帶余出城。至廟外。此時隨余縣役四人。止存一王姓者。餘暨跟隨人俱亡矣。余自分見闖賊決無生理。盡以後事囑王役。託其傳語家人。我死於國難。無恨也。須臾。聞掌號賊眾起身